

Les embarras de Rome

Plurimus hic aeger moritur uigilando; set ipsum
languorem peperit cibus imperfectus et haerens
ardenti stomacho. Nam quae meritoria somnum
admittunt? Magnis opibus dormitur in Vrbe. 235
Inde caput morbi. Raedarum transitus arto
uicorum inflexu et stantis conuicia mandrae
eripient somnum Druso uitulisque marinis.
Si uocat officium, turba cedente uehetur
diues et ingenti curret super ora Liburna 240
atque obiter leget aut scribet uel dormiet intus;
namque facit somnum clausa lectica fenestra.
Ante tamen ueniet : nobis properantibus opstat
unda prior, magno populus premit agmine lumbos
qui sequitur; ferit hic cubito, ferit assere duro 245
alter, at hic tignum capiti incutit, ille metretam.
Pinguia crura luto, planta mox undique magna
calcor, et in digito clauus mihi militis haeret.
Nonne uides quanto celebretur sportula fumo?
Centum conuiuiae, sequitur sua quemque culina. 250
Corbulo uix ferret tot uasa ingentia, tot res
inpositas capiti, quas recto uertice portat
seruulus infelix et cursu uentilat ignem.
Scinduntur tunicae sartae modo. Longa coruscat
serraco ueniente abies, atque altera pinum 255
plaustra uehunt, nutant alte populoque minantur.
Nam si procubuit qui saxa Ligustica portat
axis et euersum fudit super agmina montem,
quid superest de corporibus? Quis membra, quis ossa
inuenit? Obtritum uulgi perit omne cadauer 260
more animae.

Juvénal Satires II